

Alderdi Sozialistak lege proiektu bat pausatuko du Eurokarta berresteko


Chirac lehendakariaren erabakia salatu dute Seaskak, EAK eta EKEk

Lutxi Fourcade / Baiona

Jacques Chirac lehendakariaren Konstituzioa ez aldatzeko erabakiak kritika ugari piztu ditu Euskal Herrian. Alderdi Sozialistak ez du amor egiteko gogorik, eta lege proiektua pausatuko duela adierazi zuen Jean Espilondo diputatu sozialistak.

HIZKUNTZA GUTXITUAK solasgai nagusi izan dira joan den astean. Izan ere, Eurokarta berresteko gisan, Lionel Jospin lehen ministroak galdegin zion Jacques Chirac lehendakariari frantses Konstituzioa aldatzea. Lehendakariak ezezkoa eman zion, esanez ez zuela inolako ekimenik bultzatuko «Frantziaren ezintasuna zalantzan jarriko duena».

Egoera horri aurre egiteko, frantses Alderdi Sozialistak jakinarazi zuen atzo lege proiektu bat proposatuko zuela sartze parlamentarioan. «Gure helburua Frantziak Eurokarta lehenbailehen berrestea baita, lege proposamen bat pausatuko dugu Asanblea Nazionaleko lanak hasi bezain laster», adierazi zuen Jean Espilondo diputatuak. Alabaina, sozialistak ez zuten xehetasunik eman lege proiektuaz.



BOB EDME

Jean Espilondo diputatu sozialista.

Salaketak eta proposamenak

Chiracen erabakiak erreakzio ugari piztu zituen joan den astean. Seaskak Kontseilu Konstituzionalaren erabakia salatu zuen, «mila pusketan hausten baitu munduko futbol txapelketak piztu zuen multikulturaren miraila». Ikastolen federazioaren aburuz, Konstituzioko bigarren

artikulua aldatzea funtsezkoa da. «Mundu guztiak hizkuntzen eta kulturen aldeko aniztasun irekiaren alde pariatzen duenean, noiz arte tematuko da Frantzia, batasunaren eta uniformizatzaren bide itogarri horretan», galdegin zuen Seaskak.

Era berean, EKE Euskal Kultur Erakundeak eta Eusko Alkartasunak bi proposamen konkretu egin zituzten.

Lehendabizi, EKE Euskal Kultur Erakundearen Administrazio Kontseiluak bi eskaera egin ditu hizkuntzen eurokartari buruz joan den larunbatean. Bere etsipena adierazi ondoren, EKEk galdegin du legebiltzarkideek lege orokor bat bozka dezatela, «Frantziako hizkuntzak ondare nazionaleko aberastasunak direla printzipiotzat hartuz eta Eurokartan gobernuak izenpetu dituen 39 neurri linguistikoak, besteak beste, onartuz». Era berean, EKEko Administrazio Kontseiluak galdegin zuen herri hizkuntzak sar ditzatela Konstituzioko idazkietan.

Bestalde, Eusko Alkartasunak galdegin du erreferendum bat egitea, Eurokartak pausatu eztabaida trinkatzeko. Joan den larunbatean, Herrialde eta Populuen Elkartasuna federazioko zuzendaritzak Issy-les-Moulineaux hirian egin duen biltzarrean erabaki du ekimena bultzatzea, frantses Estatuko Berdeekin batera. Frantses estatuak hizkuntzen Eurokarta sinatu eta obratu behar ote duenez jakitea izanen da helburua. «Ikusiko da bide-nabar zenbateraino diren demokratik Frantziako lehendakaria eta horren adiskideak», gaineratu zuen alderdiak.

Etorkinentzat araudirik ez dagoela salatu du Ruiz Olabuenaga soziologoak

■ Familia
immigrazioaren
arazoa kontuan ez
hartzea gaitzetsi du

Erredakzioa / Bilbo

ESPERIENTZIA zabala izan arren, etorkinen auzian araudirik ez dagoela salatu zuen atzo Jose Ignacio Ruiz Olabuenaga soziologoak eta orain arte Espainian baliabide ekonomikoak dituzten etorkinak baino onartu ez direla azpimarratu. Ruiz Olabuenagak Datorren immigrazioa; XXI. mendearekiko joerak izenburuko hitzaldia eskaini zuen atzo, Etorkinei laguntzeko metodologiari buruz Deustuko Unibertsitatean egiten ari diren jardunaldi teknikoaren barruan.

Soziologo honen ustez, inmigrazioa «errebotez datorrigun» nazioarteko fenomeno da eta bere barruan «oso larriak» diren jokabideak ditu. Batetik, Espainia bakarririk espainolena dela eta etorkinek herrialde horretan sartzeko eskubidea ez duten ustea. Bestalde, kezkarritzat jo zuen etorkinez hitz egiten denean oro har norbanako eta gizakiaz hitz egitea. Bere esanetan, «ez dira kontuan hartzen ez familia inmigratioa, nagusi dena, ezta emakumeena ere. Horientzat ez dago inolako legediarik».

Oro har, etorkinak txiro, analfabeto eta gaizki hezitutzat jotzen direla esan zuen baina %40 baino gehiagok batxilergoa eta lanbide heziketa ikastaroak dituela azpimarratu zuen.

«Esklabo aktiboak»

Ruiz Olabuenagak gogor salatu zuen lege etorkinek bizi duten «esklabotasun aktibo» edo «heriotz zibilaren» egoera, izan ere, pertsona horiek ez baitute Espainian bizitzeko eskubide bat bera ere.

Soziologo honek «onartezinatza» jo zuen egoera hori, Estatuak ezin duela erabaki herritar batek non bizi behar duen. Hori dela eta, arazo honi aterabideak aurkitu behar zaizkiola aldarrikatu zuen hitzaldian.


EHUko irakasle kaleratuen epaiketa hirugarrenez atzeratu da

■ Enrique Lopezek defentsari eta ordezkaritza juridiko orori uko egin dio epaitegira bidalitako gutunean

Gorane Agirre / Bilbo

EHU Euskal Herriko Unibertsitateko bost irakasle kaleratuen kontrako epaiketa bertan behera geratu zen atzo, hirugarren aldiz. Oraingo honetan, Enrique Lopez irakasleak bere defentsari eta ordezkaritza juridiko orori uko egin ziolako atzeratu zen epaiketa. Lopezek gutun bat igorri zuen Epaitegira, erabaki horren berri emateko. Aldi berean, bere borondatez epaiketa edo ekintza juridiko bakar batera ere aurkezteko asmorik ez duela jakinarazten zuen bertan.

Jose Maria Sarasibar abokatuak azaldu zuenez, epaiketa datarik gabe atzeratu da, eta bost eguneko epea eman diote abokatu berria



XOUSE SIMAL

Auzipetutako irakasle kaleratuak Epaitegian, atzo.

izendatzeko, hala egin ezearn ofiziozko abokatu bat izendatuko diotela ohartarazita

Dena dela, ofiziozko abokatu izendatuko baliote ere,

Lopezek halabeharrez epaiketara aurkeztu beharko luke. Izan ere, fiskaltzak auzipetutako bakoitzarentzat urte bat eta hilabeteko kar-

tzela zigorra eskatzen baitu, desordena publiko eta agintaritzari desobedientzia delituengatik.

Jose Ramon Etxebarria, Jose Luis Herrero, Antton Azkargorta, Jesus Mari Zalakain eta Enrique Lopez irakasleak 1993ko udazkenean Leioako Kanpusean izandako gertakariengatik daude auzipetuta. Halaber, kaleratuak egon arren, urte eta erdiz eskolak ematen egon eta EHUko errektorearekin (Juan Jose Goiriena) akordio batera iritsi ostean, Unibertsitateak beren lanpostuak ordezkatzeari ekin zionean bost irakasleek garatutako protestengatik. Baita, horren kariaz, Kanpuseko sarrera debekatu zitetenean agindua ez betetzeagatik ere.